

## Mesiras da la «Missiun B» per las surfatschas agriculas

En convegno cun l'Uniun purila svizra ha il team da la «Missiun B» tschernì sis mesiras per promover a lunga vista la biodiversitad en il territori agricul ch'èn particularmain utilas per nossas plantas, noss insects, noss utschels e numerus auters animals. Surfatschas che correspundan ad ina da las sis mesiras proponidas e che vegnan creadas da nov a partir dal 2019 pon vegnir registradas sin [missiunb.ch](http://missiunb.ch).

Infurmaziuns pli detagliadas davart las mesiras per ils manaschis agriculs èn era da chattar sin [www.agri-biodiv.ch](http://www.agri-biodiv.ch). Questa pagina-web vegn messa a disposiziun da la Staziun ornitologica svizra da Sempach e da l'Institut da retschertga da l'agricultura biologica.

Las instrucziuns exactas per promover las surfatschas biodiversas èn da chattar sin la pagina-web per la promoziun da la biodiversitad en l'agricultura svizra.

### 1. Crear saivs vivas, chaglioms lung las rivas u bostgam sin ils champs

Saivs vivas, chaglioms e bostgam a la riva e sin ils champs structureschan la cuntrada e simplifitgeschan sco corridor u colliaziun da biotops la mobilitad da las spezias.

Las saivs vivas sa cumponan da differentas chaglias indigenas cun spinas u cun fritgs, da veglias plantas chavorgias u da laina morta e porschan nutriment e refugi a numerus animals.

Per dar sumbriva als animals pasculants e sco protecziun cunter il vent e l'erosiun èn ellas impurtantas per proteger las resursas (terren, aua, aria), ma era fitg preziasas per l'agricultura.

### 2. Crear foss d'aua, puzs e paltauns

I sa tracta da surfatschas d'aua avertas e per gronda part sut l'aua che fan part da la surfatscha dal manaschi.

Questas pitschnas surfatschas d'aua cuntegnan ina flora spezialisada e vegnan utilisadas da numerus animals sco spazi da viver (giomberets, insects aquatics), per la reproducziun (amfibis, libellas) u sco bavraduir (utschels, tgirallas, avieuls).

Ultra da quai han las randulinas gugent ils puzs ch'èn sin sientar, perquai ch'ellas chattan là arschiglia per far lur gnieus.

### 3. Crear surfatschas ruderalas, mantuns da crappa u da roma

Surfatschas ruderalas èn mantuns da crappa, da roma e spundas surcreschidas cun spezias ervusas.

Mantuns da crappa e da roma èn particularmain prezios per ils reptils ed ils animals pitschens.

#### 4. Crear in prà extensiv cun sems regionalis

(vesair il feigl d'infurmaziun davart [l'ensemada directa](#) e [Regio Flora](#))

Bleras gruppas da spezias sco ils salips u las tgirallas dal di han lur pli gronda varietad da las spezias en ils prads. Tgi che vul revalitar ils prads cun novas ensemnadas per mantegnair la biodiversitad sto resguardar ch'igl è fitg impurtant da duvrar las spezias ed ils ecotips da plantas existents en il conturn.

Questa pretensiun pon ins ademplir cun duvrar sem regional che deriva da l'ensemada directa.

#### 5. Crear in giraun cun flurs

Girauns cun flurs èn surfatschas d'ers da plirs onns, ensemnadas cun ervas selvadias indigenas u suenter ina cultura permanenta.

Lur fluriziun embellescha il maletg da la cuntrada da la primavaira fin l'atun. L'atun servan ils girauns da flurs ad intginas spezias d'animals en la regiun da la val sco lieu d'envernar e sco vias da recolonisar. Durant l'entir onn dattan els alloschi a numerus animals; tranter auter als insects utils sco las mustgas ballantschantas, ils baus da Nossadunna, ils baus curridurs u ils filiens.

#### 6. Crear urs sin surfatschas d'ers cun sems regionalis

(vesair il feigl d'infurmaziun davart [l'ensemada directa](#) e [Regio Flora](#))

Urs sin surfatschas d'ers èn sdrimas da plirs onns ensemnadas u surcreschidas cun ervas selvadias indigenas. L'ur sco element durabel e linear è ina funtauna da nutriment ed in lieu da refugi e d'envernada per numerus insects utils ed impurtant per l'entretschament dals spazis da viver natirals.